

四庫全書

集部

欽定四庫全書

明太祖文集卷十七

明 姚士觀等 編校

祭文

中都告祭天地祝文

曰昔者元政不綱英雄並起民不堪命苦殃不可禁荷  
蒙昊天上帝后土皇帝祗憫世民之艱苦授命於臣賜  
以文武人多良能八年以來除民禍殃臣蒙上帝后土

之恩文武之能非臣善為當大軍初渡大江之時臣每聽儒言皆曰有天下者非都中原不能控制姦頑既聽斯言懷之不忘忽爾上帝后土授命於臣自洪武初平定中原臣急至汴梁意在建都以安天下及其至彼民生凋敝水陸轉運艱辛恐勞民之至甚遂議羣臣人皆曰古鍾離可因此兩更郡名今為鳳陽於此建都土木之工既興役重傷人當該有司疊生姦弊愈覺尤甚此臣之罪有不可免者然今功將完成戴罪謹告惟上帝

后土鑒之

△即位告祭文

維我中國人民之君自宋運告終帝命真人於沙漠入中國為天下主其君父子及孫百有餘年今運亦終其天下土地人民豪傑分爭惟臣帝賜英賢李善長徐達等為臣之輔遂有戡定采石水寨曼濟哈雅方山陸寨陳也先袁州歐祥江州陳友諒潭州王忠信新淦鄧明龍泉彭時中荊州姜王濬州孫德崖廬州左君弼安豐

劉福通贛州熊天瑞辰州周文貴永新周安萍鄉易華  
平江王世明沅州李勝蘇州張士誠慶元方國珍沂州  
王宣益都老保等處狂兵息民於田里今地周迴二萬  
里廣諸臣下皆曰恐民無主必欲推尊帝號臣不敢辭  
亦不敢不告上帝皇祇是用吳二年正月四日於鍾山  
之陽設壇備儀昭告上帝皇祇簡在帝心尚饗

朝日祝文

混混沌之初兩儀無象神光未著及穹壤既立神光運行

照臨下土萬象昭明形影俱分四時序而天地位民物  
蒙恩凡有國者咸修祀禮今當仲春式遵古典致禮以  
祀謹以玉帛牲齊用伸祭告尚饗

夕月祝文

鍾陰之精配陽之德歷代相承祭以秋夕今也時已秋  
分特備牲醴祭奠伏惟神鑒尚饗

周天星辰祝文

布列周天各司舍度光燭於下人所瞻仰今季秋之時

穹碧澄清萬象輝輝朕遵古典躬伸禮祭神其鑒之尚饗

先聖三皇厯代帝王祝文

昔者奉天明命相繼為君代天理物撫育黔黎彞倫攸序井井繩繩至今承之生民多福思不忘而報特祀以春秋惟帝兮英靈來歆來格尚饗

祭西嶽華山西鎮吳山文

維神磅礴西土為是方之嶽鎮古昔帝王必知神有所

司故載在祀典為民祈福今予統中國兼撫四夷前者  
為剝罕腦兒伯顏密邇中國屢撫不服告神用討已行  
絕滅自陝西迤北民無兵禍之憂但方今河州東南西  
南吐蕃川藏等洮州三副使穎素子雖以子入侍於心  
將欲抗拒朕心有所不安特告神知命將率兵前行進  
討惟神鑒之

祭大河文

維神蜿蜒東注故稱大河古昔帝王

餘文並與  
西獻同

遣功臣等祭五嶽列鎮四海四瀆文

荷上天后土之眷命蒙神之效靈以致平羣雄息禍亂  
君主黔黎於華夏統控蠻夷於今十年中國康寧然於  
神之祀若以上古之君言之則君為民而禱載有春祈  
秋報之禮於斯之祀有望於神而祭者有狩於所在而  
燎瘞者今予自建國以來年年于茲國為新造民為初  
安是不得親臨所在而祀神也特遣開國功臣某道士  
某以如予行奉犧牲祝帛於祠下以報效靈自今以後

歲以仲秋詣詞致祭惟神鑒之尚饗

遣功臣等祭北鎮醫無閭山文

荷上天后土之眷命

此下文與五  
嶽四鎮同

今予自建國以來十

年于茲每望祭神于京師未遂詣祠而祀予當親至近  
郊而望祀奈國為新造民為初安是不得親臨所在而  
祀神也特遣開國功臣某道士某以如予行奉犧牲祝  
帛於近郊設壇以報效靈自今以後歲以仲秋遣官代  
祭惟神鑒之尚饗

奉迎社稷祝文

曩者建國之初立神壇於此其宮殿城垣一切完備後因工匠厭鎮百端於心弗寧復命工興造宮室亦已完備於社稷之思想必有厭故將神壇建於午門之右工既完成理合奉迎安祭謹告神其鑒之尚饗

奉安社稷祝文

古人之祀神也載之於書其議禮紛然莫可知其的前代神壇兩居共一壙而處於理非宜以古人言之大社

五土之神大稷五穀之神五土發生也五穀因之而茂  
焉當一壇而祭理應特選今月初一日奉二神於此合  
壇共祀以仁祖淳皇帝配神作主永為後世法神其鑒  
之尚饗

合祭天地文

曩者建國之初遵依古制祀以南北之郊御諱周旋九  
年以來見古人之意固誠於禮未為然也且人君者父  
天母地其仰瞻覆載無不恩也及其祀也則有南北之

壇終不會祀以人事度之為子之道致父母異處安為孝乎今也大壇鼎建未完朝堂新造已備時當冬至謹合祀於殿庭自今已後每歲合祀於春時永為定禮以皇考仁祖淳皇帝配神惟上帝皇祇鑒之尚饗

告廟配享祝文

曩者建國之初遵依古制祀昊天上帝后土皇地祇於南北之郊此下與合祭  
天地大同時當冬至謹合祀上帝皇祇於殿庭自今已後每歲合祀於春時永為定禮謹請皇考

配神伏惟鑒之謹告

祭岷山天女洮水諸神文

神鍾靈秀機莫人知然而福善禍淫以教人聰明正直  
之為也朕命將指揮聶緯等率兵守禦是方是方乃神  
所居之處兵既臨此就命聶緯等代朕會神以祀神其  
其無私尚饗

祭城隍蔣廟文

朕起寒微荷上天后土眷顧百神效靈君主中國曩者

平强暴息禍亂每賴戰騎以長驅邇來禍亂已平必備  
多騎以禦侮所以設太僕寺統羣牧監繁馬於郊今年  
選馬四千有三百上槽俄生疾流傳甚為朕患且朕立  
京於是方專陽道而治生民也神靈是方專陰道而察  
不德也朕有所為不得不告今馬有疾故告神知神其  
有知祐我羣牧尚饗

祭闕

山大江旗纛文

曩者兵爭已久老幼艱辛少壯奔逼苦哉甚矣當是時

賢愚思治感動昊穹於是上帝好生授民以福命予平  
禍亂育蒸黎予無已能多賴百神效靈今者禍亂已平  
十有一年矣惟西戎有密邇邊陲者洮州戎寇肆侮年  
年未曾出師問罪今特命西平侯沐英僉都督藍玉王  
弼等等率兵進討兵行會神以告神其鑒知尚饗

皇伯考啟橫祝文

惟伯考同我父皇之父母一氣由來推源及派敢不尊  
崇曩者天下大亂人無紀律兵禍流行非獨人世不安

在黃壤之下者亦不能靜居所以伯考之神魂子孫之靈魄皆陰宅於此因兵為人所發朕本無知惟使臣言其の方知伯考於是焉伯考已絕嗣矣朕本猶子故展微衷特擇地以改葬之選於今日起離舊塋謹遣某齋牲醴以告惟伯考鑒之尚饗

祭元幼主文

嗚呼生死廢興非一時之偶然乃天地之定數也所以大聖賢者於斯四事若或有一臨之皆不以為色難。蓋

謂知天命之必然是所以生順天地之命雖死亦無後  
恨此所以知天命而不惑也且君之祖宗昔起寒微於  
沙漠當是時天下巨富而為民主者兵強地廣又非一  
人而已皆不能平君寒微之祖以致革戈整戎彎弧執  
矢橫行天下八蠻九夷盡皆歸之此所以天命也延及  
君之父子正當垂衣以享承平之福何期盜生汝賴華  
夏羣雄以致君之父子號令杳然終不能平之此人事  
歟天道歟朕起寒微托身繙流朝暮起居不過侷影而

已安有三軍六師以威天下豈料應圖讞有天命衆會  
雲從代君家而主民曩者君主沙漠朕主中國因君與  
羣臣固執天命不移特以彼是我非是有鄰邦之好不  
修我不敢以使多進邇來聞君長往念昔有元之孫安  
忍不弔行人至奠以牲醴惟英靈不昧尚饗

祭隴西王李貞文

嗚呼哀哉骨肉之親昔者朕居元時生理艱辛皇考妣  
甚為憂戚惟姊孝專心爾能同之故有資助雖歟不荒

然而數年之後皇考妣長往姊亦棄世但只爾我共生  
人間忽天更元運寰宇兵爭當是時爾我各天一方消  
息莫聞彼此不知保命何期天地祖宗眷佑朕膺圖識  
撫羣英爾能有知攜兒來棲此為骨肉之親也朕嘗思  
之平日寒微親戚寡少獨存爾我但願長生不期一疾  
既臨倏然去世嗚呼哀哉痛切於心然生死之道世人  
之常今也子封公爵孫有官稱甚哉昌乎爾其有知尚

饗

祭衛國公鄧愈文

昔者爾父兄起兵於承平因兵及疾相繼而亡獨爾幼存方長纔結髮之時而又從兵十八歲而至於滁陽十有九歲朕率渡江來因爾剛柔相濟朕撫練為將以致調守諸郡爾善能馭士撫民不作非為已歷八州矣當羣雄角逐之時雌雄未定之秋朝夕患難相保爾亦多煩為斯德合前勞朕法哲王之制爾遂為名世之臣乃有衛國之爵其於人臣可謂功成名遂矣前者為西戎

肆侮命爾率衆往征已行殄滅其黨景張國威特命爾  
班師復命何期中不測之疾中道而逝不復復命矣使  
朕不覺哀哉痛哉又何望也然生死之道世人之常壽  
之短長亦未生之先有定丈夫至此生無非為之作乃  
有福祿之榮雖逝也亦何恨哉今也子已長成名將愈  
昌爾其有知尚饗

祭王恭文

始自己未年間吾渡江太平以爾入吾門而為婿後爾

長成吾有不勝之喜為疆宇日廣軍民繁衆於是內托姻親外假股肱使率兵以鎮名郡而當方面何期爾父子皆不保榮貴而務贓私容逋逃而隱有罪致是失托姻親之望絕無股肱之能故發所司以取所作之由於是免官發同庶人居未幾何有人來報爾因疾而長往然爾雖身死於國無功於親失托可謂自恨矣今也三年服終特令人以牲醴致祭爾其有知尚饗

祭義惠侯劉繼祖及妻夫人婁氏文

昔朕皇考妣薨逝賴爾惠朕葬地遂得安於陰宅念爾之德難忘特封爾為義惠侯及妻婁氏為夫人遣官齋誥命贈爾夫婦仍以牲醴致祭靈其有知尚饗

祭僉都督丘廣文

朕起兵淮右相從者衆老成者多獨爾方結髮之時荷戈戎行膽壯而氣剛凡摧堅撫順爾皆有功今天下大定正當貴身榮家樂太平之福何期年未高而忽疾杳然長逝嗚呼生死之道世人之常爾雖早亡功名昭著

丈夫至此必無憾矣爾其有知尚饗

祭安南國王陳端文

上古受胙方隅者一王綱而無二所以固封疆遣逋逃  
却有罪睦鄰邦而恤鰥寡故得二者之歡心以事先人  
爾端為民上於安南失固封疆未審曾侮於鰥寡而乃  
至占城有是此果逼迫人而若此歟彼占城無禮致徂  
征而若是歟使者來告爾歿海濱朕不覺痛心嗚呼一  
言可以興邦一言可以喪邦其陪臣之佐奚用其道有

此耶嗚呼顛而不扶危而不持焉用彼相然雖云爾亡  
邦家無虞特遣使奠祭爾其有知尚饗

祭安東縣沐陽縣鬼火墓繁文

幽有鬼神朕嘗信之不惑然陰陽之道昧在陽非君為  
民而祀之於當祀者餘不鬼神之祝為人臣而官守方  
隅如之所以為民也若庶民捨祖宗而他祀則非宜也  
君臣不為民而祀亦非也且在陰者非嶽鎮海瀆山川  
載在祀典之神承上帝后土之命福善而禍淫則神不

人見所以神之為人也若在神之為禍善而福惡者則  
非聰明正直也朕思惟神鑒人雖毫釐莫可潛偽以其  
神去來無迹出入無時故鑒知必精獨人不測於神今  
洪武十一年四月十四日永嘉侯差百戶來奏安東縣  
沐陽縣地方民人暮驚謂野有夜持炬者數百或成列  
或星散巡檢逐之無有擊之有應朕不敢聽而匿特差  
人致牲醴會爾鬼神於現形所在論問之夫中原之地  
因有元失政生民塗炭者多死者非一而已故絕宗覆

嗣者有之生離父母妻子而懸於陰陽者有之爾持炬者莫不五姓無主孤魂而欲祭若此歟正為懸隔父母妻子而有此歟乃無罪而遭殺冤未伸而致是歟莫不有司怠恭而怒之忿歟朕切問爾持炬者四事果屬何耶若是有為而至朕自即位以來凡前王載在祀典者各有時而奠他不敢妄於正直鬼神之禮未嘗缺焉爾持炬者禍應禍而福應福勿妄為民害自招天憲故茲勅問想宜知悉

明太祖文集卷十七

欽定四庫全書

明太祖文集卷十八

明 姚士觀等 編校

祭文

奠忠襄王李察罕文

草之勁者非疾風不顯人之患者非亂世難名爾李將軍當中原擾攘元政不綱大臣竊命守將擅兵于外是致干戈鼎沸國勢日危人將以為元無人矣何將軍之

忠義倡農夫為三軍拔智勇以上聞頒爵以官之明其  
分數義旗舉而兵興齊魯強兵僅能固守爾能陳兵於  
野請命於朝進退有方君命是聽當是時忠心昭如五  
曜號令嚴若冰霜所以動天地而感鬼神以其忠之所  
致夫何兵既勝志少盈納逋逃釋有罪忠義漸虧鬼神  
鑒見俄而禍膺不測殞於敵手然忠未終而姦未顯壽  
不期年果屬何耶莫不竭忠以身先而致是歟抑人臣  
之有將而若此歟噫予數其事而醉之猶生之對也靈

酣而往予紀而歸誅心之言爾其聽乎

祭柏子潭龍文

昔兵駐滻陽適當秋首正禾苗暢茂時乃無雨軍民惶惶予亦甚沮詢及土人言豐山之東潭有神龍每遇旱患禱之輒應予親詣懇切於祠神不我棄後三日乃答俄風生萬壑倏墨雲遍於太虛須臾霖雨濟我軍民然雖去此而常想二十年間凡旱患猶極目于神方今年羣牧在斯掬淵泉飲有告我者蛇入神祠予想非蛇必

神有所為而至豈牧堅裹瀆而有所惡歟抑神心悅而至歟嗚呼倏然忽然予所不知特遣官致祭并禁掬水神其鑒焉

祭平章李思齊文

卿昔為民中原時逢世亂獨能仗義施仁挺身奮臂率義旅以保關中臣元有年矣何元綱不振社稷陵替卿尚能固守臣節斬我行人忠臣之義可謂盡矣然大厦將傾非一木可支未幾元君遁去中原土地復我漢人

朕遂為生民主當是時漢人棄丘隴從元為我中國仇讐至今身膏草野骨委沙漠唯卿退守臨洮心思父母之邦義忠族類是以全境保民助我成功今七年矣夫何久疾不痊以致長往噫握兵一世又得善終亦人之所難卿能如是豈不美哉朕聞卿歿不勝痛悼今遣某官用牲醴致祭卿其享之

祭淮安侯華雲龍文

昔皆民人爾因世亂歸朕今有年矣雖無獨建奇功隨

衆勤勞多著念爾勲舊特加侯爵朕以燕地之重托爾任守務在軍安民樂委以燕相更望輔弼何期數年間軍勞民怨詢其所以乃爾巨府院擅工役害衆成家書云作善降之百祥作不善降之百殃推爾之故莫不去賢而近愚忘所以報神人共怒致令如是歟抑爾前生壽數有定而若此歟然當在生之時可為善而不為今事已往其幽冥處判無私已在目前是非還自知否朕有誓曰生封侯而死謚以公著為常典爾生前守爵而

害官民法不當公止葬以侯禮且薄情不厚所以責之  
也爾其聽之尚饗

祭滁陽王文

曰曩者羣雄鼎沸之時民不堪命王乃奮臂定遠拔濼  
城而守之朕方從軍幾被他人所害惟王能活我致有  
今日盡平天下家國已成再生之恩終世難忘今者督  
工鳳陽道經環滁塋祠在斯遣官致祭尚饗

中都祭開平王文

曰思爾相從於今二十有二年矣然爾去世倏經五載  
若觀聽容聲止有一十七年耳當前十七年間東征西  
伐櫛風沐雨奮不顧身開拓疆宇朕知爾心至如嚴號  
令帥三軍摧堅撫順英風冠世海內知名其為丈夫也  
莫不慨然心至生也如是死也封王寰宇既稱祖宗光  
耀子受公爵女嗣后基今古如是者甚不多見今年夏  
四月朕親至中都驗功勞公侯相從護駕者羣然行失  
爾隊列亡爾班使朕心惻然因祠在斯特以牲醴享爾

如生爾之昔友皆隨來奠神其不昧尚饗

祭先陶神文

神於初世治陶尤精挺埴為器窯治成功今古不易用  
且無窮神之公志有若是耶今也命匠施陶為朕所用  
特遣官致祭更祈聽後之人身無他患始終完成是其  
禱也神其鑒之尚饗

祭溫州千百戶文

曰歷代設兵衛在乎禦侮職於斯者則有櫛風沐雨野

宿風食披堅執銳之勞以其臨陣也則有捨父母忘妻子奮不顧身乃能克敵功著史冊名冠天下如此者實古名將已然之事是致家榮貴國磐石至今昭昭朕統天下以來中國方寧法前人之所為守在四夷自洪武初至今倭夷數為寇於海濱生離人父母妻子損傷物命特勑爾等聽將軍靖海侯吳禎令舟營海上以靜方隅夫何朕政有缺天風大作怒號於滄溟之上爾乃恪恭將命信地弗違是有檣傾楫摧舟碎爾亡然生死之

道世人之常得其死者既廣不得其死者甚多今爾諸人為國為民而殃及於身事雖如是不為汎然訃音一至朕將何措雖感傷於衷爾生安得而歸故特遣某官臨海設壇致祭仍命僧衆修設道場追薦爾魂使有所歸凡有官者則祿爾子孫軍士父母妻子則給糧養贍靈其有知承此祭享

祭保誌法師文

昔者師能出世異人性備六道景張佛教使兒頑從化

善者愈良及其終也擇地於鍾山之陽陰其宅而居之  
經今八百六十七年今朕建言在邇其為師焚修者俯  
而視之因勅中書下工部造浮圖於山之左今將完成  
徙師於是於戲漏盡母生人我刼終勿墮塵埃惟師神  
通尚饗

龍江祭太歲尊神文

上帝好生凡有國者必欽承而效之則民安物阜邇年  
以來西南諸夷歲為邊民患斯患也稱自堯舜以至于

今化弗循教征弗畏威蓋恃崇山而固險倚林木之深  
叢跳梁出沒虐良民而傷生今遣江夏侯周德興充征  
南將軍進取散茅等洞安慶侯仇成充征南副將軍征  
取容美等洞以及散茅其遣將發兵必欲推堅撫順以  
靜西南兵行特專昭告神其鑒之尚饗

禱雨咨京都城隍文

天久不雨時將過矣實予之罪首夏亢陽本欲禱於上  
帝后土慮恐煩聽以致因循至今良民失望皆有憂心

予不敢逕達上帝后土於今月十一日親告于鍾山之  
神望神轉達於上帝后土惟京都城隍之神先期與報  
至日祝焉

禱雨有應謝鍾山神祭文

天久不雨蒸民懷憂予將告神而未施乃先城隍必城  
隍善予所云故告旱之辭未許神其我知即日大雨時  
行今來詣山而謝神神正無私祐我蒸民謹謝

祭漢蔣秣陵尉文

今年仲季夏間上帝震怒皆朕失奉天心作為太過以致朝廷多事軍民弗安既受帝命遑遑無措知無不改然未知天意曾無回乎俄爾有來告者當帝怒時神祠亦有干焉朕思神非朕謟朕非謟神朕凡無知陰道以情理推之必因新建而人愆累神然皆朕不能斷而致是今既工成而有帝責之跡本不敢完既成而廢恐人失瞻望特依跡完之朕非佞神嘗聞向者福善禍淫每皆當焉朕所以美神已往陰功無謟母敢弗扶陰而化

民故時祀之今完之欲民為善耳他無所干牲醴之奠  
神其饗之

祭外祖楊王文

孫起布衣於淮甸漸羣雄之來從凡二紀於茲其間摧  
堅撫順歛跡豪雄平禍亂於寰宇播聲教於八埏安黔  
黎於市村是以尊稱華夏耀揚六軍握九伐之威以鎮  
頑積四海之利以賞善斯非上天后土之昭鑒海嶽之  
效靈家祖外祖累世皆積陰功奚若是耶每念外祖之

靈必欲親詣年思月想終不遂行為其國事浩繁弗克  
詣前今特命外從孫曹國公李文忠以牲醴之奠獻於  
陵所以建靈堂及云追封外高曾祖考妣之由惟我外  
祖英靈不昧尚饗

祭外高曾祖考妣文

非累世陰功奚生我母必積德廣深感格天地福加於  
我然幾暇常思無由展報為其育母之深恩曠如昊天  
后土雖欲報勞焉能及之今節届孟秋特專內臣奉御

杜亮齋衣儀詣陵告祭尚饗

祭仲姊曹國長公主文

感傷父母鞠育之恩思惟姊孝父母之專時刻有省油  
然動心更思父母初逝兄弟相離姊我是別當是時也  
各天一方悲傷痛切惟鬼神知我此時雖居至尊未嘗  
有忘今也節屆孟秋特遣內臣奉御徐慶齋衣儀詣姊  
墳所姊其享牲醴受衣儀悅父母之英靈尚饗

祭宋威武軍承宣使張淵文

世物皆消長朕疑格以觀之然其所以然矣再閱古而  
目今聽智賢之所云乃有不磨者惟功德著於人神而  
能永焉昨宰營繕者入奏謂爾威武軍承宣使張淵陰  
宅其下既開而見辭知捨身以捍患每禦侮以防姦當  
善終於淳熙甲午之孟秋爾君念忠勤而不忘遂勒石  
於墳今朕勑宰營繕者鼎新陰宅於是於戲捨身而身  
存堅忠而名著其不磨也而謂忠焉者矣故茲奠祭爾  
其享之

祭濟寧侯顧時文

嗚呼訃音來報云及爾亡遂感傷終始發究心之無窮致涕淚欷歔而已又忽歡動衷情謂識千古之將有所不及夫何如哉蓋將能成功而不為敵所辱朝野無議但嬰微疾遽然長往此所以名世良臣爵及子孫祿榮於家斯善終之萬幸也然生死之道今古不異世人之常於戲摧堅撫順被甲胄於年年其報效忠勤日星昭著靈其有知以享斯祭

祭兩浙運使李世傑文

爾昔壯時以武從事東征西伐推堅撫順爾皆有功剛正不屈公多在職賄賂無知所以命職煮海他官弗肩錢糧辦集已及數年正當高壽之時恐精力不繼遂令致仕養老於家曩者王溥不遵朕諭累犯憲章朕命釋之今年汪信來首云溥非為爾為前導朕聽斯言必奸臣共謀者因是罪及傍人者衆無乃過乎事未久而爾亦逝矣疑其為此而有愆歟然或真偽彼此朕所不知

今爾臨葬之時特差內臣奠而囑之爾其尚饗

祭千戶夏以松文

曩元之季海內分爭英雄者非一擅聲教罔知天命者多惟爾以松思鄉里之切遂倡義旅自維揚渡江東來助朕征行以致有功前數年福期高壽命從子襲爵使爾優游以終天年邇聞訃音一至思於相從甚至感傷今特致祭靈其不昧

祭都督何德文

爾自聽命以來勤勞累著功業愈多朕將報功賜以巨賞何期但嬰微疾遽然長往然壽雖未足歸去人歡何也以其為將而功著朝野不為敵所辱而得善終豈不善之善者也

祭四輔官安然文

爾中土之士昔當元末從事義旅効力於元職掌兵夫及元運終大將軍長驅齊魯當是時爾守齊東爾為中土之士祖宗丘隴在焉所以棄元歸我其來甚誠朕於

爾嘉是以數授之以重任每臨方面累有極刑之犯者  
三朕嘗釋之前年為坐視胡惟庸陳寧為惡意已同姦  
朕思來歸之美仍前釋之昨為朝無人用復召爾來想  
必加誠事朕何期鬼神鑒焉爾懷自愧之疾遽然幽往  
朕觀所以必有究乎然朕尚思初歸之意猶加牲醴之  
奠

祭營田使馬世熊文

嗚呼長者之歸也盡天之道乎所以天之道禍亂不作

於善災害不萌於良使得善始善終天之道也爾世熊  
昔役公門未嘗輕惑於人及帥義旅度量宏深士卒感  
恩時當高年前月爾孫來奏云老疾少侵是月歸奏乃  
知訃音嗚呼傷哉嗚呼快哉且傷傷善人去世君子誰  
同快快於善始善終而盡天理也朕務甚失遣使問疾  
時已過矣特遣人祭於靈所世熊有知尚饗

祭小張國公文

爾本有元之臣率衆閩外禦侮防閑偶爾部下生變挾

爾來歸實非本情居朕京師已有年矣今既年邁老疾日侵終於長逝特遣某官以牲醴祭奠爾其有知尚饗

祭江陰侯吳良文

昔忠誠之士從君堅身許之志故犯患涉難以尊一人而安天下蒼生立高名不朽於史冊今古智人覽之無不歎心爾吳良從朕於擾攘之秋年馳月驅櫛風沐雨野宿風食披堅執銃十有四載方封侯爵今又十四年矣正欲安享富貴何期為營造而出嬰微疾而長往訃

音至京朕何言哉然為將之士忠於君而能平禍亂為民作福而乃身得善終爾無憾矣遣人以牲醴致奠靈其不昧尚饗

祭孔希學文

曰三綱五常之道始上古列聖相承率修明以育生民至於中古將欲墜焉非先師孔子孰能修明之今生民多福惟三綱五常之具備耳蓋世之大德者天地不渝沒人民無惡聲所以為帝者師血食千萬世不泯子孫

存焉朕以爾孔希學繼世焚脩永張斯教以顯爾祖何期訃音一至云及長往嗚呼襲封榮貴克保令終可無憾矣特遣使以牲醴致祭爾其饗之

祭真人張正常文

繼出世法統仙度人禦災捍患機幹萬靈飛符仗劍轉斗移星雷神聽令妖魅潛形道光斯時貌正精英何乘鸞之去急控法印於上清今遣人奠以牲醴爾其有知

尚饗

祭署令劉英文

昔者朕寓居是方存亡者感英父子之恩至今猶存情懷未嘗有所忘也前者英赴京來朕為機務浩繁兼壽有年失顧問于英三日復覺令人覓英所在莫知所之稽於金川之門守者報無知英之出入復於京內物色數日乃知英還矣命召復來再見久未至再命召之告者乃云英亡嗚呼感恩之道常懷感恩之禮未終英遽然長逝朕思昔恩不勝嗟悼特以牲醴之奠祭之英其

不昧饗之

明太祖文集卷十八

欽定四庫全書

明太祖文集卷十九

明 姚士觀等 編校

古詩

春日鍾山

春吟鳥樹聽流泉澗下鳴泉鳴山谷迥迥處野人情吾  
吟吟未已孰與春相迎相迎桃李花鶯燕鳴丁丁蟋蟀  
盛蟠科寰宇樂民生

鍾山

二首

遊山智盤旋俯谷仰奇巔松聲細入耳雲生水石邊敲  
竹猿長嘯臨崖視鹿眠白鶴來天翅玄裳羽翼鮮采芝  
擣桂子任意恣蹁躚野人溪外語黃鸝轉更便山靜鳥  
歸疾林深紫暮煙樵還漁罷釣暢飲樂吾年

又

暑往鍾山阿巖幽清興多薰風自南發森松鳴弦歌玄  
猿嘯白日丹鳳巢桐柯靈芝秀深谷祥雲盛差哉樹隙

觀天碧天青似綠荷迥聞樵採木曲澗沿珠螺鳥樂山  
深邃予歡顏亦和野人逢問處樂道正婆娑

詠李白短歌行

漁樵較長短是非盈耳滿話盡誠渺茫山水各悠長買  
臣文章中蟠溪望鬢霜兩人隔千古美惡皆一場爭能  
在當時雄氣超榆桑罷釣平紂暴休樵飲瓊觴賢愚自  
不泯黑白成殊光

題西施

天生兩奇絕越地多羣山萬古垂青史西施世美顏窈  
窕精神緩悠然體態閑笑擁丹唇臉皓齒出其間一召  
起閭里句踐扼雄關伐謀應得志西浙徑親攀鐵甲乘  
潮渡黃池兵未還

賜應奉陳溥歸關中

卿家居三川大河環蜿蜒吳山在西土華岳翠東天涇  
渭水浩瀚終南固南邊藍田關倚碧秦嶺橫紫烟太白  
峯高處炎天雪似綿今卿年本邁歸志不留連火帝當

時節沿途善保全  
陸行還謹宿乘舟  
渡深淵智人能識已  
獨不仗生前慎冥晨  
煙進搖鞭紫陌遷  
虎牢逢故壘漢楚孰  
英賢銅驅聞挾彈  
翁仲立巍然伊洛天  
清水梁唐今幾年  
崤函西入國潼道扼  
黃埏百二山河壯  
英雄在守焉至老經  
遙涉胸開意自便  
人情偶相合相離  
更何言我不能人教  
卿當自勉旃

鍾山膚吳沉韻

塞我倚空碧環山皆拱伏遙岑如劒戟邇洞非茅屋青

松秀紫崖白石生玄谷巖畔毓靈芝峰頂森神木時時  
雨風生日日山林沐和鳴盡啼鶯善舉皆飛鵠山中道  
者禪隴頭童子牧試問幾經年答云常辟穀白鶴日間  
朋黃猿夜中僕萬歲神仙榮千秋凡人祿無知甲子壽  
但覺年數福彩雲出洞中鴻濛山之麓

又賡戴安韻

旭日射山巖嵐光加翠色鳴鳳在高柯育雛傍崖側風  
來楸葉紅寒鴈起塞北江流護周迴天澄雲影碧磅礴

氣氤氳鴻濛太古積靈秀峙差峩仰瞻常晨夕倚天來  
何時孰謂題名籍朱湖洞中仙蟠桃徑一尺

又賡答祿與權韻

時雨濟八荒萬物皆精爽遙岑歛白雲巖壑盡軒敞啼  
鶯舞林麓民樂更何想樹底清風生花磬送至往野人  
入市沾沾畢還山上庶士問民瘼王綱仁義掌智人若  
峯巒天下有所仰埋雲疊嶂松微音琴撫響

天竺僧

比丘乾竺來情思脫禍胎去鄉十萬里飛錫不塵埋宵  
晝觀軌大無時不常懷志立無上等必欲精神諧忽然  
觀身影影乃與身偕若欲離塵垢將影與身拚再觀世  
萬物有形必影該尋思欲解分似乎與理乖空寂如是  
說咸將貝葉開論影始太古至今尚猶猜日午難迴避  
臨水見眉腮月下偏分曉愚云似恠哉智人果解分禍  
胎兩忘災或說身裁影亦曰影身裁顛倒論常世倒顛  
日日俳觀倦身意馬勞心猿似駒到了難分去從伊子

細差閉門終不見出戶倚身牌有時定玄機俯仰何根  
荄祖佛如何定影子在塵埃爾昇從爾上爾降從爾階  
躊躇從躡躅穿履亦穿鞋反復誠難避簪花猶挿釵虛  
寶誰參透天厨一供齋八萬四千戶閭閻邇榭臺雞犬  
聲無異莊周化骨骸漆園曾作吏槐國已知槐幻中生  
幻夢幻影與身哀影幻身亦幻何時有壯衰若欲常寂  
靜百骸與之齊智慮渾忘却天然似嬰孩

賡僧韻

天台五百尊方寸皆明月月影彌千江何曾有暫歇為  
斯妙用通今古長不滅昔當懸挂時誠非凡可越住世  
及應直幾度阿僧劫假錫作梯航泛海濤如雪一旦杳  
無蹤暫與沙門別儻忽羣禪中孰能為機泄禪心曠無  
跡如海亦何竭僧本具他心宗門常合轍

善世禪師

前年拜辭去今春二月歸未開湖海濶但見禪眸輝踏  
雪來朝覲家風祖佛規默坐各無語方寸究徘徊櫻花

繞臉笑柳眼正舒眉獨翁任清淨愚俗多險危姦猾不  
善死到處冢纍纍爾心鑑此患棄家永不回年年常作  
客如蓬被風吹哀憫自天祐仁深久必為切記無住相  
與佛莫相違

寶光廢塔

寶塔摩青蒼招提歲久荒秋高樓俊隼夜深月影長寂  
寂星搖蕩飛霞入棟梁守僧都去盡螢火作燈光鬼哭  
思禪度遺經風日張獨有來巢燕呢喃似宣揚停驂傷

古意雲合草頭黃聞說當年盛鐘魚徹上方

歌行

賡僧錫杖歌

由來震旦始乾竺扶老應須棲此杖鈴鈴琅琅妙且奇  
撼振一聲空谷響或時化作飛龍威長空如水何相持  
有時比翼露端的方覺玄關顯現時志悟未通心委曲  
鴻濛渾沌同塵俗驀然一悟凌烟霞覺此覺他方意足  
神眸昭昭衆生顧隱隱微微如法故每擔日月猢猻藤

簞食由來飽祇樹

寺中猫食肉

緊行慢行皆虎形  
室中捕鼠百般能  
精舍一隙透靈鼠  
朽殘經卷將何補  
為斯育爾佛釋迦  
日逐隨僧常茹素  
常茹素一旦筵前舒爪距  
爾勤爾役誠可錄  
賞彼丹衷命食肉

春日鍾山行

我愛山松好雲埋  
常不老幾度春風吹  
更綠勝似蓬瀛

美三島石徑聞藥馨流泉嫩春草草青啼鳥澗邊幽玄  
鶴摩空來晨早錦衣隊列出山阿飲客婆娑歸更飽山  
清水清我亦清有秋足我斯民寶

倭扇行

滄溟之中有奇甸人風俗禮奇尚扇捲舒非矩亦非規  
列陣健兒首按獻國王無道民為賊擾害生靈神鬼怨  
觀天坐井亦何知斷髮斑衣以為便浮辭嘗云卉服多  
捕賊觀來王無辨王無辨眉褶袴籠鬆誠難驗君臣跣足

語蛙鳴肆志跳梁干天憲今知一揮掌握中異日倭奴  
必此變

明太祖文集卷十九

欽定四庫全書

明太祖文集卷二十

明 姚士觀等 編校

五言律詩

望鍾山

疊嶂盈門竇虛看滿座雲凭闌松氣濕俯宸篆煙伸鶯  
轉聲來耳風催磬襲人近山佳景盛彤殿盡良臣

題老君廢廟

廟古鴉昏集遙瞻起敬心路幽人跡杳碑偃草叢深度  
關先紫氣去後永淪沉惟有庭前樹多年茂作林

題扇示胡日星

有一古老叟胸中羅星斗許朕作君王應仙人口賜  
官官不願予金金不受持此一握手四海遂行走

五言排

長江潦水詩賡吳伯宗韻

炎蒸和氣淳化水亦無渾出峽飛輕雪湍山潤厚坤蟄

蛟從此出浮鷺亦斯奔旋轉如深井轟流瀉巨盃連雲  
龍氣躍振木虎情蹲浩蕩瀰千里鴻濛印萬村影搖咸  
浪合光射集雲屯尾尾穿波鯉揚揚透霧鯢逶迤洪海  
口委曲大龍門汙漫無知已汪洋實的存沛然清宇宙  
廓爾豈晨昏汨汨涼隆暑人間潦水尊

七言律詩

鶯轉皇州

二首

絮飛鶯轉柳垂青春雨過時天正晴新澗水流聞鼓韻

舊崖松掃聽琴聲神州氣象寰中盛天闕風光世上明  
猶有上林花似錦殿階仙樂鳳笙鳴

又

禁城新柳葉成帷隱映黃鸝深處啼晴蝶逐風翻上下  
晨雞閣日唱東西華衢紫陌人煙盛繡戶朱門燭焰底  
景物美看茶酒肆粉鈿遙擁坐輕蹄

詠京師

臣民推戴號神京嘆息驅馳行伍行轉戰羣雄機尚記

帥征英俊量方平如今已足勲功賞向後無知孰永名  
暇日試將銅鏡照烏髭堪比玉垂纓

詠唐陶將軍率舟師

昔人奉命駕兵船為國精忠突曉煙令出三軍憑戰鼓  
呼來萬馬仗龍泉相加若肯存生意比並何須用着鞭  
必定清塵要服外收功應達九重天

詠柳州城戍守

城居邊徼壘遐荒煙瘴盈眸鬻氣茫日暮海風搖屋樹

春秋溪水泛籬牆思軍久戍炎蒸地必將巡防熱中腸  
但願昊穹舒造化洗清鬱結利同鄉

詠南越

邊邑深隍嵌疊峰土民食粟扣時春雲山溪水常相合  
煙樹藤蘿每自封嶺外瘴溫鳴蟋蟀海濱鬱熱顯鯛鱠  
常思不律皆由此數月朱顏別舊容

諭臨蒸縣官

臨蒸邑治絕遐方巒葉重山碧翠行溪曲羊腸嵐雜霧

樹盤龍體雨飛湯墨雲隙處天澄水蒼海空中日曜陽  
好把寸心問民瘼當還離瘴任瀟湘

聞人嶺南郊行

極目山雲雜曉煙女蘿遙護嶺松邊陸行盡服嵐霞氣  
氷宿頻吞虬蜃涎晨仰際峰觀擁日暮看臨海泊來船  
信知百越風塵異黑髮人居不待年

思開平下毗陵

憶昔雄師罷戰灰開平猶有教軍臺自從南向北征去

直到如今永不來思起相從不憚役想來奮戰愈增哀  
有時夢裏還相見枹鼓聲中旗甲開

詢洛

洛水官

闕

衣絳袍

闕

河清碧淨飛濤千年翁

闕

萬

闕

往昔崎函車路

闕

當今憇鶴洞雲高

世充固識天垂象以致唐皇展豹韜

盧汀洲隱浦

泛入遙江漸渺茫蘆花飛落雪飛揚天邊雲影浮舟靜

村外秋光列鴈行覓隱誰知棲所在用心無處不籌量  
廬生避世深幽跡故入滄浪野水鄉

山滄溟隱谷

野人孤寂萬重山夜聽猿啼峰頂間洞口白雲時自長  
溪中清水日流湍柴扉半掩松森處爐火頻添月色閑  
已絕世塵忘俗事吞霞服氣玩靈丹

川原和居野

滿目平原桑棗餘那將田地長青蕪黃童逐豕隨牛後

白叟乘驢繼馬祖煙樹半遮村酒旆雲山常見市廛圖  
野人自是無拘束一日三番醉盡壺

竹幹青樂釣

曠浦澄天濕曉煙智人樂釣穩沙前簑輕雨霽雲收合  
釣櫛綸樞水映船舉棹欲歸江月上掛帆已近暮雲邊  
汀蘆處處飛螢火照徹漁村飲不眠

牧羊兒土鼓

羣羊朝牧遍山坡松下常吟樂道歌土鼓枹時山鬼聽

石泉濯處澗鷗和金華誰識仙機密蘭渚何知道術多  
歲久市中終得信叱羊洞口白雲過

巨罟叟漁魚

悠悠江靜日和暄迥水歌聲度藹煙漁網布時天上曬  
布帆張處斗移邊風恬喜目遙山嫩岸濕頰看邇草鮮  
薄暮欲歸星月上流螢點點近船舷

橫秋風吹笛

西風落木綻黃花牛背村童笛正佳曾識倚

闋

每聞闋

遐蒼江一色渾秋意紅葉初光襯曉霞

涼露下天星斗潤煙波聲到是誰家

滄浪翁泛海

海天漠漠際無窮巨艦檣高挾兩龍帆飽已知風力勁  
舵寬方覺水清雄鰲魚背上翻飛浪蛟蜃鬢頭觸見虹  
何日定將歸泊處也應繫纜水晶宮

莽滄叟歌山

仰目巍峰柱上穹千巖萬壑盡玲瓏玄猿嘯月丹崖側

紫燕摩天碧漢中樵牧往來雲樹裏牛羊歸去霧烟東  
山中人物常歌道歲歲年年莽蒼翁

擒禽獸伏

機人設罿欲擒謀利鎻調弦勁弩頭禽獸無知騰躍進  
雲霧深處觸嬰收湯仁祝網施洪惠禹智剗山展大猷  
今古人情常不一孰將天道與心籌

鍾山雲

踞蟠千古肇豪英王氣葱蘋五色精巖虎鎮山風偃草

潭龍噓氣水明星天開萬載興王處地闢千秋永朕京  
咸以六朝亨替閱前禎禎後後嘉禎

鍾山雲雨

崔嵬萬壑玉籠葱蘋鬱雲濃雨碧松千古鍾靈佳氣盛  
幾年淮秀瑞光萌倚天絕壁參銀漢拔地穹崖構梵宮  
時向望中閑極目神機造化正鴻濛

新春賡王釐韻

春到陽和萬象舒至陰深歛九泉居山川氣靄堅冰泮

嶽瀆雲生冷露除但向靜中觀造化特專閑裏運圖書  
仁聞堯德兼天地大治蒼生惟舜虞

又賡劉仲質韻

陽昇陰降轉洪鈞柳眼初舒造物新泮却堅冰澄碧海  
浮遊暖氣拂玄旻從茲宇宙皆清泰始覺輿圖治化淳  
淑鳥嚦音鳴處處弄晴花蝶舞先春

春山新水

山雲縠縠節初暄景色清明春水連谷鳥喜鳴花沐雨

巖猿悅躍樹籠煙仙家麥飯雲蒸熟旅館薇羹氣育鮮  
最好滿川渾似錦漲溪新水印晴天

春水滿四澤

陽舒陰暢澤盈流不卜應當大有秋春雨花紅林木盛  
曉晴巖紫氣嵐浮江臯釣艇蓑翁樂雲谷山人鶴仗悠  
麥已蟠科煙禁日呢喃燕語祝皇猷

兩洗山松

四山松柏夕塵連宵雨朝來洗滌鮮聲聽微風翻碧浪

光舒初氣捲青煙啼猿日晚跳還躍舞鶴雲歸旋更翩  
林麓笙簧鶯囀巧洞仙騎鹿上遙天

雨洗山

初光入暑木陰森遠邇層巒塵滿林浩蕩薰風至時雨  
洗清巖壑爽煩襟天邊浪滾因松綠山外雲飛仗氣深  
正是農家耕耨節野田處處盡歌吟

暑霽遙岑

蒸雲斂盡遠山青萬壑涼生宇宙明林影淡搖溪內水

崖光偏映洞邊藤倚欄極目天開畫凭檻吟詩紙耀星  
但把此時觀畝畝筋疲力倦始秋成

嘆秋

碧梧露結曉凝霜蘆葦彌漫積雪揚鴻鴈翩翩來薄霧  
巨魚跳躍下清江風聲落木深秋意雲影垂天印日陽  
閑看滿川黃菊藥因蜂搖動暗浮香

設潘宗道送友人歸山東

共到神州獨爾歸相攜握手更牽衣秦淮鳥轉乾坤泰

鍾阜巖生日月輝去此魯田多種粟寧鄉齊地廣裁薇

逢交必諭王綱振

闕

編氓莫法違

遣使為大祀犧牲北至齊魯

欽天惟恐不精誠命爾齋符馳驛行淮海濟州連地闊  
江河徐邑曠川平智人一目胸懷爽霸業千年帝道興  
俗異語殊南北辨由來混一大嘉貞

題隱者

固潔精魂欲上天幽居深處水雲邊煙封遠浦沙鷗盡

樹鎖前山草鹿眠書假管城應復路楮生墨客未回川  
逢人更祝堅清志必日雲衢足躡前

雪山寺

極目遙岑起曉煙深埋凝雪梵王禪冰枝老樹彌千壑  
衲被蒼僧布法筵為美浮生貪着處好將空寂化迷遷  
六年嶺際今猶見行致天花覆八埏

又賡周衡韻

彤雲昨夜布長空曉日遙岑白愈豐蓋世銀粧黎庶戶

盈巖玉砌梵王宮漁樵各伎誰容易釋道貪生孰建功  
造化亦由人事見十朝一雨五當風

僧目空山

孤寂淒淒一徑微處心應與世塵違朝觀松鶴摩天去  
暮見巖猿挽樹歸瓶水一爐香滿座錫鑼丈室氣盈衣  
空山僧對知何日化作蒼龍挾雨飛

命板的達穩禪

居山本是出塵埃何為遊人役已骸晨坐巖前觀日上

暮禪松底聽風來從教市巷笙歌美莫羨閭閻酒肆諧十二時中香裊篆迎來送往更毋開

題神樂觀道士

仙翁調鶴欲扶穹萬里風頭浩氣雄翎背穩乘空廓外丹光橫駕宇寰中飛符到處雷神集役劒長驅厲鬼窮見說黃芽心地轉更於何趣覓仙宗

雲衲野人

山人修道幾經年聞說食松足意便時以斷雲完故衲

日將流水灌新田常勤侶鶴巖崖下寂靜儔猿煙霧邊  
欲訪未知何處住料應霞舉已成仙

鍾子煉丹

翠微高處渺清煙知子機藏辟穀堅丹鼎鉛砂勤火候  
溪雲巖谷傲松年潭龍掣電深淵底崖虎生風迥洞邊  
徑已苔蒙人未履昂霄足躡斗牛天

早行

忙着征衣快着鞭轉頭月挂柳梢邊兩三點露不為雨

七八箇星尚在天茅店雞鳴人過語竹籬犬吠客驚眠  
等閑擁出扶桑日社稷山河在眼前

新月

誰將玉爪指長空萬里山河一樣同映水有鈎魚怯釣  
銜山無箭鶴疑弓清光未放雲霄外素影遙分宇宙中  
輪滿待逢三五夜九州四海照無窮

賜都督僉事楊文廣征南

大將南征膽氣豪腰懸秋水呂虔刀雷鳴甲胄乾坤靜

風動旌旗日月高世上麒麟真有種穴中螻蟻竟何逃  
大標銅柱歸來日庭院春深聽伯勞

接樹

老幹將去伐去燒從新接起舊枝條雖然未歷風霜苦  
自是先沾雨露饒三四鉞泥牢護足二三皮箠緊纏腰  
東君看顧歸家后分付兒童莫去搖

五言絕句

咏雪竹

雪壓竹枝低雖低不着泥明朝紅日出依舊與雲齊

七言絕句

鍾山

翠微突兀倚晴穹日色暄和紫氣濃谷內野猿跳上下  
鶯啼悠韻樂三冬

望鍾山白雲

二首

鍾山萬疊白雲浮密鎖松梢爽氣流石徑雨痕苔蘚綠  
蒼崖根底蟄龍湫

又

萬壑松陰起曉風  
硃崖雲幕亘長穹  
應知造化誠難測  
頃刻霧靄顯至工

鶯轉皇州

二首

嫩柳鶯啼三月天  
園林簪錦綠陰鮮  
乾坤氣集皇州處  
景盛人繁勢自然

又

皇州春曉日增輝  
旅館廷餐賜遠夷  
淑氣鳥催鳴上苑

篆煙細裊出形聞

東風

我愛東風從東來  
花心與我一般開  
花成子結應花盛  
春滿乾坤始鳳臺

新雨水

片雲風駕雨飛來  
頃刻凭看潤九垓  
檻外近聆新水響  
遙穹一碧見天開

萍生

性覺先春膚色金垂青之後漫精英飛來陸野還成柳  
飄入淵池化作萍

思遊寺

雨落黃梅麥已秋日思精舍夢還遊晨昏幾度經鐘聽  
巖壑雲生出野樓

雨墜應落花賡徐瑛韻

人道春歸實不歸但知結實蕊枝稀昨朝一夜如膏雨  
正是花成子就時

又賡吳詰韻

時近清和氣愈濃雨催花實喜晴風籬邊點點如錢大  
盡是青青間綠紅

又賡馬從韻

霏霏颯颯又紛紛致使平原草色新一夜好花都結子  
乾坤大地沒埃塵

又賡宋璲韻

清和未至尚春風花幕園林似錦紅細雨只教成子速

蕊飛彩蝶最多功

又賡朱孟辨韻

瀟瀟雨灑墜花頻  
襯地由來似禪齒  
獨有乾坤能造化  
生成萬物最多仁

又賡桂慎韻

好風吹謝實成花  
糾結飛飛似錦霞  
志者春光陰寸惜  
人生一世幾榮華

又賡劉仲質韻

天地多仁惟好生致令草木結華英因風細雨枝頭看  
花已飛時子已成

雨後晴雲賡馬懿韻

萬疊晴雲起遠峯舉頭極目見天中江山如畫民安樂  
溽暑蒸苗秋不空

暑蒸物盛

殿礎氤氳紫氣生石泉瀧瀧似流行山蒸海湧薰風節

萬物依時得遂亨

望雨

日望天邊起密雲  
身常皎潔日常晴  
憂思禾槁民何福  
腹內心煎意自憐

濟時雨

暑雨天晴江漢清  
寰中擊壤賀昇平  
羣卿盡職人風古  
省已修身合上明

目遠山

雲謁遠山風至雨  
一簾高揭暑咸收  
太平無事民康日

正在調和理順秋

青山白雲

四首

凌穹巒葉翠江邊佳氣氤氳素練纏勢若遊龍真造化  
油然縹渺似飛綿

又

雲凝雨後翠張綿隱露遙岑將近天潭水龍吟吹白浪  
丹崖穹處暮收煙

又

青山雲靄雪凝枝畫作長生太古詩猿鶴自如巖谷迥  
出塵野老本心知

又

鍾山萬木暑陰森巖壑松風奏玉琴溪澗碧流聲韻美  
望中佳興致題吟

又賡易毅韻

鍾山洞口綵霞長萬壑雲生濟至陽猿鶴每棲渾意樂

黃旗紫蓋世興王

又賡盧均泰韻

鍾山曙色夏初長巖壑嵐生輔太陽幾度雨餘天一碧  
遙岑羅列更非常

山頂白雲

山椒極目白雲崇蕤色繽紛百丈松新水潺岩聞鼓韻  
女蘿遙似洞門封

春望牛首

遙岑峙立勢蒼然春聽鶯啼景物鮮疊嶂倚天江月外

三山映帶石城邊

秋日鍾山賡裴植韻

倚蒼羅列數奇峰巖谷雲生萬態容或爾有時樓閣見  
分明一體廣寒宮

詠李白遊洞庭湖

蒼梧山色水何分碧鏡澄湖杳渺雲惟有古人堪羨處  
湘妃猶自望虞君

詠李白早發白帝城

二首

白帝城高萬疊間江雲朝出暮猶還信知千古英雄地  
雖險應須德作山

又

謫仙東下入瞿間一葉扁舟日日還聞說衝濤千尺浪  
兩江極目盡皆山

詠李白秋下荆門

布帆高掛映長空且喜新秋冷露風數日輕舟歸似箭  
須臾繫柳泊吳中

老禪紙帳

樓閣崢嶸半倚天  
老禪紙帳晝酣眠  
精魂惟識黃龍劒  
定省還知叩玉泉

雪詩賡韓文輝韻

陰極陽生墜玉花  
飄颻颯遍天涯  
歌樓酒肆呼茶急  
繡戶重裯樂貴家

又賡李睿韻

陰極陽生建至和  
飛花勝六王山阿  
從斯瘴癘同雲捲

喜見民人相與歌

又賡曹文壽韻

翩翩飛舞布田垓似絮還疑玉藥梅一夜撲窓春蝶戲  
好風吹去又推來

又賡張翼韻

臘前三白曠無涯應是天公降六華九曲河深凝底凍  
張騫無處再乘槎

寺掩山深

二首

絕跡高人隱翠岑山連疊嶂白雲深欲經無覓通人處  
時忽林風送磬音

又

見說山中了道僧不聞鍾鼓不聞經朝觀樹頂香煙裊  
暮識禪機一鏡明

又賡馬懿韻

山深樹密嵌幽巖僧舍清虛門鎖嵐有客問禪無覓路  
已知出世不同凡

雲山僧寺

雲龍紫翠概鴻濛洞口風生度梵鍾我欲叩禪閑問道  
老僧心地與天通

又賡吳沉韻

天生倚碧壯雲奇巖壑隆峰萬古宜谷內野人機面壁  
從前甲子了無知

鍾山僧寺賡單仲右韻

三首

遊山必是叩僧禪聞說神僧透宿緣山果玄猿搖綠樹

方知入定是金仙

又

精藍幽谷寺差峩風過松聲韻碧波寂寞出塵天外景  
驛鶯雜還意奚何

又

山勢峻嶒谷隱僧六通具足勢層層鵲巢冠頂忘機處  
午夜明星識已能

飛鳥化鳥

幻化由來顯妙工。幕天席地自從容。  
還知飛鳥成雙鳥，猶且同塵入宦中。

仙人

仙人鶴背幾經秋。神出塵寰宇宙游。  
鐵笛橫吹天地外，肯將精氣渾茫儔。

天界寺春雀

春風夜雨沐花妍。曉霽簷前雀噪喧。  
孰謂可知機裏事，飄然翕翮舞長天。

賡玘太朴韻

花逢夜雨曉看妍實蕊凋時暗不喧試問老禪幽得處  
謂言物外有青天

神樂觀道士

聞說仙人豈等閒年年辟穀鍊金丹虛心盡却玄中覽  
特後絃歌謁帝壇

咏菊花

百花發時我不發我若發時都嚇殺要與西風戰一場

遍身穿就黃金甲

示僧謙牧

寄與山中一老牛  
何須苦苦戀東洲  
南蠻有片荒草地  
棒打繩牽不轉頭

征陳至瀟湘

馬渡沙頭苜蓿香  
片雲片雨過瀟湘  
東風吹醒英雄夢  
不是咸陽是洛陽

不惹菴示僧

殺盡江南百萬兵。腰間寶劍血猶腥。  
山僧不識英雄漢，只凭嘵嘵問姓名。

咏虹霓

誰把青紅線兩條和雲和雨繫天腰

優人彭友信應韻云

玉皇昨

夜鸞輿出萬里長空駕玉橋

又續增七言律詩

采石磯新秋月色

素月澄澄斗轉移。銀河一派徹東西。  
風隨鼓角爭先後。

鳥避旌旗不敢啼志若明蟾清絕羈心同碧漢靜無私  
雄師夜宿同英武氣槩森森采石磯

贈劉伯溫

妙策良才建朕都亡吳滅漢顯英謀不居鳳閣調金鼎  
却入雲山煉玉爐事業堪同商四皓功勞早賤管夷吾  
先生此去歸何處朝入青山暮泛湖

明太祖文集卷二十